

Au das Jahr dörfed mer vor vollem Hus weder eusi Schnetzelbänk bringe  
dörf d`Liselott eusi Helge zeige und ich no d`Värs dezue senge  
er gsänd also mer s`Komedi-Team send s`läbige Bewiesmetel  
das mer au Erfolg cha ha ohni klaute Dokortetel

Em Altersheim seit de Hans zum Heiri s`esch scho fang allerhand  
jetzt händ doch be eus em Bondesrot d`Fraue scho d`Oeberhand  
also hätte mer sinerzyt scho gwösst das die wänd d`Macht überneh  
jo den hätte mer dene vor Vierzig Jahr secher ned s`Frauestemmrächt geh

De De Weck de Chef vom Schwyzer Fernseh du de loht ned log  
ond er holt nachem Baumann Frank au no de Roger Schawinski zrog  
also du wenn de so witermacht den hauts mi Mueter os de Fuege  
well den chasi e Zuekunft am Samstag Zobe weder de Teleboy luege

D`Schütze d`Jäger ond Patriote die säge gottseidank  
au nach der Abstemmig do händ mer Schwyzer no eusi Waffe em Schrank  
hengäge meint mini Nochberi also du mer Schwyzer mer spenne  
ich för mini Bedürfnis ha höchstens emol de Pöschler em Chaschte enne

Kenned er scho der Ondersched oder kenned er en noni  
zwöschem Christian Constantin ond em Silvio Berlusconi  
jo also du wemmer erlech send de wächslet ganz em Vertaue  
der Eintig glich schell sini Trainer wie der Ander sini Fraue

Euse Gmeirot heig schiends en Brief gschrebe ad Axpo Adrässe  
also das met euchere Starchstromleitig das chönnd er jetzt ändgöltig vergässe  
well mer er Zuekunft euse Strom das wird euch zwar ned gfalle  
sälber produziere düend of em Dach vo der Turnhalle

Z`Rinike esch ein es Wasser gheit ond emmer tüfer gsonke  
esch paarmol uftaucht ond het Wasser geschlockt jo de wer fascht vertronke  
bes en de schliessli grettet händ het er e Halbstonnd om Hilfe gschroue  
do meint ein vom Kanton glaub mer müend do no be dem Radwäg es Bröggli boue

Chenderlieder os de Schuelzyt vergesst me ned so schnell  
ond wenn si den nochli modernisiersch jo den sends Höt no aktuell  
zom Biespel roti Rösli ossem Garte und Tannescht ossem Wald  
wenn jetzt de ned ändli de Musiktag chonnt jo den verwelke si bald

Met de neue „Uniform“ das bestrittet kein Schwanz  
do erstrahlt euses Fasnachtskomitee weder e neuem Glanz  
e dem Zämehang hät ich do no ne Frog an Höchste vo euser Regierig  
Gmeindamme a wellere Fasnacht machsch du ändli dini Neuuniformierig

Also du mer Riniker mer händ d`Köpf jo schwer lo hange  
well met eusere Stammbeiz do esches velli Jahr nor abegange  
doch jetzt gots gottseidank weder ufe set em letschte Mai  
jo ond wer esch tschold dodra he dank eusi Freunde from de Türkei

Ich chönnt mer jetzt no vorstelle das es euch langsam tuet stenke  
das ich am Schloss emmer so blöd Froge wer zahl`is öppis z`trenke  
dromm schlön ich vor das mer de Värs för Hür emol vergässe  
jetzt wo Tannegg so guet chocht wette mer lieber öbbis z`Aesse

Wend z`Brugg ond hür de Konfettispalter tuesch en Sponsorbitrag schänke  
den dünds der ar Fasnacht als Dank deför en Fahne ed Altstadt hänke  
be eus z`Rinike goht das vell eifacher jo do muesch ned emol gross plane  
do brengsch s`Gäld der Opus e de Bar ond wend den heigosch hesch au e Fahne

*Der Komedi*

Wänd er me bsueche? Ich be dehei onder „[www.komedi.ch](http://www.komedi.ch)“

Wiso kritisiere eusi Medie eigentlech D`Schiefahrer so fescht  
nome well die lieber vierte send als of em Podescht  
ond was schriebe ächt den do vo mim Vårs öber d`Schiewältmeisterschaft  
well de hets nähmli ned emol onder die erste 12 gschaft